

«Çojeni gjithandej bamirësinë e gjallë të Zotit»

Duke përkujtuar Nënë M. Elisa Andreolin

Hyrja

Sipas traditës së Shërbëtoreve të Marisë Riparuese, kremtimi fillon me këngën e përshëndetjes së Virgjërës Mari.

A. Të falemi Mari, hirplotë Zoti me ty.
E bekuar je mbi të gjitha gratë,
dhe i bekuar është fryti i barkut tënd, Jezus.

Shenja e kryqit

U. Në emër të Atit e të Birit e të Shpirtit Shenjt.
A. Amen

Kengë: *Sa bukur është*

Ref. *Sa bukur është, o Zot,
të rrim së bashku,
e të duhemi ashtu si do ti,
këtu është Zoti. Aleluja.*

Dashuria është e duruar,
dashuria është e ëmbël,
dashuria kupton, nuk zemërohet
e nuk humbet kurrë. **Ref.**

Dashuria të fal,
dashuria përshtatet,
ajo falet pa pushim,
me gëzim e përlësi. **Ref.**

Paraqitja

L. Motra e vëllezër, jemi të bashkuar në lutje në këtë ditë, përvjetori i 85-stë i lindjes në qiell të së lumes Shërbëtores të Zotit Nënë Maria Elisa Andreoli, themeluese e Shërbëtoreve të Marisë Riparuese. Duam të falenderojmë Zotin që na ka dhënë një grua dhe një nënë me shtat të madh shpirtëror, e shënuar nga përvoja e dashurisë së Zotit, që e bëri atë t'i dorëzojë fatin e saj dhe të Institutit vetëm Atij, kujdesit dhe mëshirës së tij. I kërkojmë Zotit, që edhe jeta jonë të jetë e bashkuar në shenjtërim nga virtyti i bamirësisë, falë mirëpritjes së veprimit të Shpirtit Shenjt.

Lutje

U. Të lutemi.
O Atë, që me provaninë tënde disponon gjithçka sipas planit tënd të shpëtimit,
na udhëhiq me Shpirtin tënd,
që jo vetëm me fjalë,
por me vepra e me jetë
të mund të dëshmojmë
dhe kështu të hyjmë në mbretërinë e qiellit.
Nëpër Krishtin, Zotin tonë.

A. Amen.

1. «Vetëm Zotin unë kërkoj, Jezu Krishtin unë dua»

Degjimi i Fjalës

L. Dëgjojeni fjalën e Hyjit nga libri i Ligjit të përtërirë (6, 4-9)

Dëgjo, Izrael, Zoti, Hyji ynë, është një i vetëm.
Ti do ta duash, pra, Zotin, Hyjin tënd, me gjithë zemër,
me gjithë shpirt dhe me tërë forcën tënde. Dhe këto fjalë që sot po të urdhëroj do të mbeten në zemrën tënde; do t'ua ngulitësh bijve të tu, do të flasësh për to kur rri ulur në shtëpinë tënde, kur ecën rrugës, kur ke rënë në shtrat dhe kur çohesh.
Do t'i lidhësh si një shenjë në dorë, do të jenë si shirita midis syve, dhe do t'i shkruash mbi pllakat e shtëpisë sate dhe në dyert e tua!

Psalmi (17, 2-3, 19-20. 31. 47)

Ref. *Të dua, o Zoti kështjella ime ku unë strehohem.*

Të dua o Zot, forca ime,
O Zot, shkëmbi im, fortesa ime, çlirimtari im,
Zoti im, shkëmbi im, streha ime; mburoja ime, shpëtimi im i fuqishëm dhe mbrojtja ime. **Ref.**

Më sulmuan në ditën e fatkeqësisë sime,
por Zotin e pata mbështetje,
Ai më qiti në vend të shpëtimit,
më shpëtoi sepse më do. **Ref.**

Udha e Zotit është e përsosur,
fjala e Zotit është e sprovuar me zjarr;
Ai është mburojë për ata që strehohen tek ai.
Është Zoti! Qoftë bekuar Qeta e strehimit tim!
Qoftë madhëruar Hyji, Shpëtimtari im! **Ref.**

Leximi

L. Nga shkrimet e Nënë M. Elisa Andreolit
«Vetëm Zoti është i aftë që të mbushë zemrën time. Unë nuk dëshiroj tjetër veçse t'ju dua, me gjithë mendje, me gjithë zemër, me gjithë vullnet». «Mua më mjafton që Ai të mbetet i lavdëruar në këto shtrëngimet e mia». «Dua të bëhem e shenjtë në atë mënyrë që do Jezusi». «Burri im është vetëm Jezu Krishti, Zot e njeri i vërtetë, që jeton në të Shenjtërueshmin Sakrament. Vetëm Ai më mjafton». «Fal gjithçka; lutem për ata që më trishtojnë»; «... e vetëdijshme për atë që [Jezusi] i fali kryqëzuesit e tij ... fal gjëresisht çdo ofendim».

Thirrje

U. Nënë M. Elisa Anderoli lejoi të terhiqet nga dashuria e Zotit dhe e njohu mirësinë e tij të pafund. O Zot Jezus, na dhuro hirin tënd që edhe ne të ndjekim me dashuri të zjarrtë.

Refreni (këngë)

Ref. *Unë do të ndjek, do të ndjek ty o Zot
dhe në rrugën tënde unë do të eci.*

Unë do të ndjek në rrugën e dashurisë tënde,
e do t'i dhuroj botës jetën. **Ref.**

2. «Të dashura bijat e mia, sa ju jam mirënjohëse dhe sa ju dua»

Dëgjimi i fjalës

L. Dëgjojeni fjalën e Zotit nga letra e parë e shën Palit drejtuar Selanikasve e Korintasve (1Sel 2 7-8, 2Kor 3,2-4)

Ju trajtuam me butësi, ashtu si një nënë e dhembshur që përkujdeset për fëmijët e saj. Kështu, nga përzemërsia e ngrohtë për ju, ishim të vendosur t'ju jepnim jo vetëm Ungjillin, lajmin e mirë të Hyjit, por edhe vetë jetën tonë, sepse na u bëtë shumë të dashur. Ju vetë jeni letra jonë, e shkruar në zemrat tona, e njohur dhe e lexuar nga të gjithë njerëzit. Është e qartë se ju jeni një letër e Krishtit, e shkruar nga ne shërbëtorët e Hyjit, jo me bojë, por me frymën e Hyjit të gjallë, jo në pllaka guri, por në pllaka të zemrave njerëzore. Këtë lloj sigurie kemi falë Krishtit, përpara Hyjit.

Këngë (Lp 32,9-12)

Pronë e Zotit është populli i tij,
Jakobi është trashëgimia e tij.
Ai e gjeti atë në një tokë të shkretë,
në një vend të ulurimave të vetmuara.

E rrethoi që ta mbronte, u kujdes për të,
dhe e ruajti si bebëzën e syrit.

Si shqiponja që vigjilon mbi të vegjlit e saj,
që fluturon mbi follenë e zogjve të saj,
ai i hapi krahët dhe e mori, e mbarti mbi flatrat e veta.

Zoti, ai vetëm e udhëhoqi,
nuk ishte me të asnjë zot i huaj.

Leximi

L. Nga shkrimet e Nënë M. Elisa Andreolit
«Ndonjëra më pyet se pse mbaj dy unaza ari, një në të djathten e një në të majten, te gishtat e unazës? Përgjigjem: Ajo në të djathtë më lidh me Dhëndrin Jezus; duke e shikuar ma shton zellin për ta dashur e për t'i shërbyer; ajo në të djathtë më lidh me bashkësinë që më ka besuar Dhëndri; në vuajtje, në shkurajim, e shikoj dhe e puth, ndjem e inkurajuar. Pse ari? Sepse dashuria ime për Jezusin Dhëndër, dhe e Komunitetit Bijë, duhet të jetë e zjarrtë, e dlië, e shkëlqyeshme, për të gjithë, pa njollë, plot me bamirësi, me sakrificë, me pastërti». «Hyji im, e mirë e pambaruar, na mbaj shtrenjt në Zemrën e shenjtë të Marisë derisa të gjitha një ditë të mund të bashkohemi në qiell».

«Të dashura bijat e mia misionare në Sena ... Unë lutem gjithmonë për ju. Jini të sigurt se sa më larg jeni, aq më shumë ju mendoj dhe ju mbaj shtrenjtë në zemër ... të dashura bijat e mia të largëta unë ju dua shumë, shumë».

Thirrje

U. Nënë M. Elisa i ka dashur bijat e saja shpirtërore me dashuri të butë, me përkujdesje të veçantë e vendime të ndriçuara.

O Zot Jezus, na bëj mikpritës të mësimave të saja me ëmbëlsi, të besuara nën udhëheqjen tënde.

Refreni (i kënduar)

Ref. *Vetëm ti je bariu im, kurr asgjë s'do t'më mungojë.
Vetëm ti je bariu im o Zoti im, o Zoti im.*

Më udhëheq mbas teje, në livadhe të gjelbërta
Në përrenjtë e qetë atje lart,
ku më i pastër është uji për mua
ku etjen ti më shuan. **Ref.**

3. «Ndërmjet jush të mbretërojë ajo bamirësi, që shumë zemra i bën një dhe e lehtëson jetën»

L. Dëgjojeni fjalën e Zotit nga letra e shën Palit drejtuar Filipjanëve dhe nga letra e parë e shën Pjerit (Fil 2,2-4; 1Pjt 1,22; 4,8)

Bëjeni atëherë të plotë gëzimin tim dhe jini në një mendje, tregoni të njëjtën dashuri, jini plotësisht të bashkuar e në një linjë arsyetimi. Mos bëni asgjë nga fryma e kundërshtimita nga egoizmi, por me përlusë konsiderojini të tjerët më të lartë se veten, duke mos kërkuar vetëm interesat tuaja, por edhe të të tjerëve.

Tani që keni përzemërsi vëllazërore pa hipokrizi, ngaqë jeni pastruar duke iu bindur së vërtetës, kini për njëri-tjetrin dashuri të zjarrtë nga zemra. Mbi të gjitha, kini dashuri të zjarrtë për njëri-tjetrin, sepse dashuria mbulon mëkate të shumta.

Psalmi (133)

Ref. *Është bukur që vëllazërit të jetojnë së bashku*

Oh, sa mirë dhe sa bukur
është kur vëllazërit jetojnë së bashku! **Ref.**

Është si vaj i çmuar i derdhur në kokë,
që rrëshqet nëpër mjekër, nëpër mjekrën e Aronit,
që rrjedh deri në skajin e mantelit të tij. **Ref.**

Është si vesa e Hermonit,
që zbret në malet e Sionit.
Sepse atje Zoti e dërdh bekimin,
jetën përgjithmonë. **Ref.**

Lexim

L. Nga shkrimet e Nënë M. Elisa Andreolit
«Të gjitha të konsiderohen si motra; si të tilla të duhen, të ndajnë keqardhje dhe ndihmohen me njëra-tjetrën; të tregojnë me fakte që lidhja e bamirësisë bashkon shumë zemra në një të vetme». «Lutëm që në ju të jetë gjithmonë e gjallë bamirësia ndërmjet jush; domethënë të duheni pa anshmëri; të ndihmoni njëra-tjetrën; ndjeni keqardhje në dobësitë tuaja; kurrë mos e përcmo atë që bën tjetra; akuzoni veten, falni motrat; e këshu me radhë. Nëse do të veproni kështu bashkësi juaj do të jetë një parajsë». «Të uroj që Dhëndri hyjnor të ta mbajë gjithmonë ndezur llambën e bamirësisë, derisa në orën e vdekjes të mirëpresë në qiell dhe të dhurojë çmimin e virgjërave të mençura e të kujdesshme». «Jetofsh e vdeksh nga dashuria për Jezusin e kryqëzuar dhe për të shenjtërueshmen Marinë e Dhimbshme. Gjithë pjesa tjetër është asgjë».

Thirrje

U. Jeta e Nëna M. Elises na ka mësuar që «përlusëia është nëna e bamirësisë». O Zot Jezus na jep edhe ne shpirtin tënd të Shenjtë, që të lejojmë të pastrohemi nga çdo egoizëm dhe të udhëhiqemi nga bamirësia e ndërsjelltë.

Refreni (i kënduar)

Ku ka bamirësi dhe dashuri

Ku ka bamirësi, Zoti është aty.

4. «Do të doja të bëja, që Zotin tim Jezu Krishtin, ta duan mijëra e miliona zemra»

Dëgjimi i fjalës

L. Dëgjojeni fjalën e Zotit nga libri i Isaisë e nga Veprat e Apostujve (Is 58,10-12; Vap 1,8)

Në rast se plotëson nevojat e të uriturit dhe ngop shpirtin e pikëlluar, atëherë drita jote do të lindë nga terri dhe terri yt do të jetë si mesdita. Zoti do të të udhëheqë vazhdimisht, do të ngopë shpirtin tënd në vendet e thata dhe do t'ju japë forcë eshtrave të tua; ti do të jesh si një kopsht i vaditur dhe si një burim uji, ujërat e të cilit nuk shterojnë. Njerëzit e tu do të rindërtojnë rrënojat e lashta, kështu do të quhesh riparuesi i të çarave, restauruesi i rrugëve që janë të jenë të populluara. Do të merrni fuqinë nga Shpirti i Shenjtë dhe do të më jeni dëshmitarë në Jeruzalem në gjithë Judenë, në Samari, deri në skajin e dheut.

Këngë (Lk 1,51-56)

Ai veproji pushtetshëm me krahun e vet;
i shpërndau krenarët me mendimet e zemrave të tyre; i përmbysi pushtetarët nga fronat e tyre dhe i ngriti të përlulurit; i mbushi me të mira të uriturit dhe i ktheu duarbosh të pasurit.

Ai e ndihmoi Izraelin, shërbëtorin e vet, duke i kujtuar për mëshirën e tij, ashtu si ua pati deklaruar etërve tanë, Abrahamit dhe pasardhësve të tij, për gjithmonë.

Lexim

L. Nga Kushtetuta e Shërbëtorëve të Marisë Riparuese të 1920 (art.3)

«Nuk mjafton të ndjekim ato frymëzimet hyjnore që motrat mund të kenë në soditjen e mundimeve të Jezusit dhe dhimbjeve të Marisë, është akoma më e nevojshme të kujtojmë që e lumja Virgjër, mbas ngjitjes së Jezusit në qiell, u mundua me ngulm për shpirtërat që Ai kishte shpëtuar. Nga kjo shfaqet qëllimi dytësor i këtij Instituti, të imitojë me të gjithë forcat Nënë e

Dhimshme me zellin e zjarrtë për shpirtërat e me dhembshuri të butë për nevojat shpirtërore e të përkohëshme të të afërmit. Kështu që pritet me çdo kujdes edukimi i fëmijërisë dhe i veprave të tjera të bamirësisë».

Thirrje

Refreni (i kënduar)

Jezu Krisht je jeta jonë, aleluja aleluja.

Jezu Krisht je jeta jon, je jeta jonë aleluja.

5. «Hyji është dashuri»

Shpallja e Ungjillit

L. Dëgjojeni fjalën e Zotit nga Ungjilli sipas Markut (Mk 12,28-34)

Atëherë një nga skribët, që e kishte dëgjuar diskutimin e tyre, duke kuptuar se aiu ishte përgjigjur mirë, iu afrua dhe e pyeti: «Cili është i pari i të gjithë urdhërimeve?». Dhe Jezusi u përgjigj: «Urdhërimi i parë është: Dëgjo, o Izrael! Zoti, Hyji ynë, është i vetmi Zot; duaje Zotin, Hyjin tënd, me gjithë zemrën tënde, me gjithë shpirtin tënd, me gjithë mendjen tënde e me gjithë forcën tënde. I dyti i ngjan këtij: Duaje të afërmin tënd porsì vetveten. Nuk ka urdhërim tjetër më të madh se këto». Atëherë skribi i tha: «Mirë, Mësues. The, sipas së vërtetës, se ka vetëm një Hyji dhe s'ka tjetër përveç tij; ta duash me gjithë zemër, me gjithë mendje, me gjithë shpirt dhe me gjithë forcë, dhe ta duash të afërmin porsì vetveten vlen më tepër se sa gjithë holokaustet dhe flijimet».

Pas shpalljes së Ungjillit mund të ndiqet një reflektim nga ai që e drejton ose mund të lexohet një tekst i Magjisterit, si për shëmbull n.18 i Letres enciklike Zoti është Bamirësi të Benediktit XVI: «Shenjtërit...»

Lutja ndërmjetësuese

U. Të lavdërojmë Zotin, Hyjin e shenjtë dhe të mëshirshëm, që bën mrekulli në atë që e mirëpret Fjalën e tij të jetës së pasosur, dhe lutemi së bashku me besim:

A. O Hyj Ati ynë, ti i ke dhuruar Kishës tënde Nënë M. Elisa Andreolin, që në jetën e saj të ka kërkuar vazhdimisht, duke u frymëzuar nga Virgjëra, për të kuptuar planin e dashurisë sate të mëshirshmemdhe për të përbushur vullnetin tënd.

Ne të falenderojmë për këtë dhuratë mirësie dhe të lutemi: na dhuro, që nën shëmbullin e shërbëtores sate besnike, të duam dhe të shërbejmë projektin tënd të shpëtimit dhe të dashurisë për të gjithë njerëzit;

bëj të lavdërohet mbi këtë tokë;
na dhuro hirin që me besim presim ...

Një hapsirë e shkurtër heshtjeje që secili të formulojë, në zemrën e tij, hirin që do të kërkojë.

Ati ynë

Lutje

U. Të lutemi.

O Atë i shenjtë, na ndihmo që të vendosemi në dëgjim të Fjalës sate,
për të njohur e për të dashur gjithnjë më mirë e më shumë; dhe për tu hapur në dëgjim të anktheve e të shpresave të njerëzve,
për t'i qëndruar besnikërisht thirrjes sonë të shërbimit dhe të lutjes së kishtarë.
Nëpër Krishtin Zotin tonë.

A: Amen.

Përfundimi

U. Të shkojmë në paqe, duke kujtuar se të dëgjosh e të duash vlej në shumë se të gjitha holokaustet dhe sakrificat.

A. Falenderojmë Hyjin.

Këngë: *Sipas traditës së Shërbëtoresve të Marisë Riparuese, takimi përfundon me këngën Të falemi Mbretëresha ose një tjetër antifonë mariane apo një këngë e përshtatshme.*

Redaktuar nga Postulacioni SMR

(Përkthyer nga motër M. Bardhe Gjini smr)

1. Shkrimet e Nënë M. Elisës janë marrë nga *Përkujtimet, Letrat, Ditari, Tekstet shpirtërore dhe Rregullat e jetës.*